



12. november 2015

UKA2015/18

**Uunga siunnersuut: Imm. 1-imi allassimasutut, imm. 2-mi piffissamut pilersaarut allassimasoq naapertorlugu aammalu imm. 3-mi aningaasaleeriaasissat allassimasut akuleriissillugit mittarfinnik pilersaarusiornissamut sanaartornissamullu Naalakkersuisut peqquneqarnissaannik Inatsisartut aalajangiiffigisassaat.**

**(Ineqarnermut, Sanaartornermut Attaveqaqatigiinnermullu Naalakkersuisoq)**

12. november 2015

UKA2015/167

**Assartuussinermi ataatsimut akissaajaatit annikillisinnissaat, timmisartuussisarnerup akulikillinissaa aamma unammilleqatigiinnerup annertusisinnanera siunertaralugit Mittarfinnik sanaartorneq pillugu Inatsisartut inatsisissaattut siunnersuummik qinigaaffimmi matumani Naalakkersuisut saqqummiussinissaannik peqquneqarnissaannut Inatsisartut aalajangiiffigisassaattut siunnersuut. Tamanna pissaaq mittarfiit, qulimiguullit mittarfiisa akunnisimaartarfiisalu piusut amerlanerpaamik 19-inut ilaasoqarsinnaasunut mittarfinnut millilernerisigut aamma allilernerisigut.**

**(Inatsisartut sanaartornermut ataatsimiititaliaat isumaqatigiittoq tamarmiusorlu, ukunanga inuttalik Inatsisartunut ilaasortat Anders Olsen, Siumut, Jens-Erik Kirkegaard, Siumut, Tillie Martinussen, Demokraatit, Ane Hansen, Inuit Ataqatigiit, Kalistat Lund, Inuit Ataqatigiit)**

Innuttaasut nunami piffimmiit piffimmut angalasinnaaneranut pingaarnerpaaq tassaavoq nunap angallannikkut aamma attaveqaatilersorneqarnikkullu inissisimanagera. Angallannikkut aamma attaveqaatilersorneqarnerlu nunami inuussutissarsiornikkut sinaakkutissiisarpoq periarfissiillunilu.

Angallanneq attaveqaatilersornerlu pitsaanngippat taava innuttaasunut ataasiakkaanut akisoorujussuusinnaavoq aammalumi inuiaqatigiit ataatsimut isigalugit. Pitsaasumik ataqatigiissarneqarsimanngippat taava aamma inuiaqatigiinni inuussutissarsiornerup ineriartornissaanut aporfiulersinnaavoq.

Kalaallit Nunaanata aningaasaqarnera piffinni kingullerni unammillernartumiippoq. Atugarissaarnermut aningaasartuutit qaffakkiartortut aammalu isertitat pingaarnersaat ukiumut 50 mill. koruuninik naalagaaffiup tapiissutai annikilliarlorlutik aningaasat naleerukkiartorneri pissutaallutik.

Tamatta nalunngilarput ullumikkut Kalaallit Nunaannit angallannikkut attaveqaateqarnikkullu inissisimanagera nutaaliaanerpaananilu aningaasartuuteqarfiungaatsiarloq. Taamaasilluni innuttaasunut ataasiakkaanut inuiaqatigiinnullu aningaasartuuteqarnerunermik kinguneqartitsisarlu. Aningaasartuuteqarnerunerit atugarissaarnitta pitsanngorsarnerunissaanut atorneqarsinnaangaluartut, soorlu paaqqinnittarfinnut



pitsaannerusunut, atuarfinnuut pitsaannerusunut imaluunniit peqqinnissaqarfimmut atorneqarsinnaangaluartut, atorneqartarput angallannikkut attaveqaateqarnikkullu pissutsinut naapertuutinnngistumik nutaanngilisoorsimasunullu aningaasartuuteqarnerunernut.

Taamatullu aamma pitsaanerpaanngitsumik inissisimanerup aamma inuussutissarsiornikkut ineriartornissamut kinguarsaataalluni. Kalaallit Nunaata angallannikkut attaveqaateqarnera taamaasillunilu aamma takornarissanut akisuallaartarpoq. Kalaallit Nunaat takornarialerinerup tungaatigut periarfissaqarluaralarpoq, kisianni ullutsinni tikitassatut toqqarneqassanani, nunap tikinnissaa aamma nunap iluani angalanerup akisuallaarnera peqqutaalluni.

Piffissanngorpoq politikkerisut pingaarutilinnik aaliangernissatsinnut. Aaliangertariaqarpugut, sipaarfiusinnaasunik kinguneqarsinnaasunik saniatigullu aamma inuussutissarsiornikkut ineriartortitsinermik kinguneqarsinnaasunik.

ATASSUT-mit qulakkeerusupparput, maannakkut siunissamilu aningaasaqarnikkut sinaakkutissat pitsaannerusumik atorneqarnissaat aammalu nunatsinni innuttaasunut sinaakkutissat pitsaanerit. Aningaasartuuteqarnerunerit attatiinnarsinnaanngilavut aammalu angallanneq attaveqaatilersungaaneq pitsaanngitsoq, allaanerusumik iliorsinnaagutta.

ATASSUT-mit kissaatigaarput suliffinnik amerlanerusunik pilersitsinissaq angallannikkut attaveqaatilersugaanikkullu allannguinnikkut, annerusunik nutaanillu mittarfiliornissamut aaliangernerup kingunerissavai sinaakkutissanik taamaaliornissamut pilersitsineq. Kisianni pisariaqarpoq, maannakkut aaliangernissat, utaqqinata.

Maannakkut nuna tamakkerlugu politikkerisut aaliangertariaqarparput suut nunatta ataatsimut isigalugu iluaqutiginerpaassaneraa. Nuna tamakkerlugu qinikkatut sumiiffinni ataasiakkaani soqutigisat aallaavingalugit eqqarsartaaseqarluta sulisinnaanngilagut.

ATASSUT-ip Naalakkersuisut isumaqatigivai Naalakkersuisut peqquneqassasut immikkoortoq 1 naapertorlugu mittarfiliorerit pilersaarusioneqassasut aamma sananeqassasut, piffissamut pilersaarut immikkoortoq 2 naapertorlugu aamma immikkoortoq 3-mi aningaasalersorneqarnissaa malillugu.

ATASSUT-ip aamma Naalakkersuisut imm. 167-mut allannguutissatut siunnersuutaat taperserpaat. Naalakkersuisut peqquneqassapput qiningaaffimmi matumami nunap immikkoortuinut ataatsimoorussamik silaannakkut angallannerup immikkut pilersaarusioneqarneranut ilanngunneqassasooq qanoq nunatta ataatsimut angallannikkut aningaasartuutit apparsarneqarnissai pillugit aamma akulikinnerusumik timmisartuussisarsinnaanerit. Immikkut pilersaarusiame aamma ilanngunneqassapput mittarfiit heliportillu pioreersut ilaasa millineqarsinaaneri ilaasalu allineqarsinnaaneri nunap immikkoortuini mittarfinngorlutik.

Taamatut ATASSUT-mit oqaaseqarluta siunnersuutip ataatsimiitaliami suliarineqarnissaanut innersuussutigissavarput.

Qujanaq oqaaseqarsinnaaninnut!